

Te Heheuraa Api

E ITE ĪA OUTOU I TE PARAU MAU, E NA TE PARAU MAU OUTOU E FAATIAMA

TE VE'A A TE EKALESIA A IESU MESIA I TE FEIA MO'A
I TE MAU MAHANA HOPEA NEI

NENEIHIA I PAPEETE, TAHITI, I TE MAU AVA'E ATOA

Te hoo: E 30 farane i te matahiti.

No 3

-- MATI 1949 --

MAT. 36.

E PARAU NA TE PERESITENI

UA ite tatou paatoa i te parabole tei papaihia i roto i te Bibilia no te mau vahine paretenia tei faaî i ta ratou mau mori no te oro'a faaipoiporaa, a tiaî atu ai no te haamatoraa o te oro'a. Aita te tahi pae i mana'o e maoro te feia faaipoipo e aita ratou i faarahi mai i ta ratou hinu mori, ua faaî noa i ta ratou mau mori e tira'tu ai. Area te tahi pae ra ua afai atoa mai ratou i te tahi hinu mori, i roto i te hoê farii hinu, e ia pau te hinu i roto i ta ratou mau mori, no te maoro o te tiairaa, te vai noa ra ia te hinu i roto i te tahi farii, e ia ite ratou i te feia faaipoipo i te haereraa mai, ua faaî faahou ratou i ta ratou mau mori e ua haere ratou i te oro'a faaipoiporaa ra. Ua faaruehia te tahi pae vahine paretenia aore a ratou e hinu mori e aita atura ratou i tae i te oro'a faaipoiporaa.

E mea papu roa te auraa no teie nei parabole, oia hoi, ua hinaaro Iesu ia hi'o tatou i mua e ia faaineine hoi no te mau mea e tupu i mua ia tatou i roto i to tatou oraraa, ia ore tatou ia roohia i te ati, e a ore râ, i te peapea.

I teie nei mau mahana e mea rahi roa te ohipa e roaa i te

feia rave ohipa, e mea maitai roa te pene puha, tei nia roa hoi te pene pârau e te manuia nei te mau taata atoa i roto i ta ratou mau ohipa. E mea tia roa ia tatou ia feruri maite e ia hi'o i mua roa. E mea tia roa ia tatou ia haaputu i ta tatou mau faufaa i teie nei e ia haapao maitai i ta tatou mau moni ia ore ia pau i te haapao ore. Eiaha tatou e hoo mai i te hoê mea faufaa ore, ia faaapî râ tatou i to tatou mau fare e ia haaputu hoi tatou i te mau taihaa no te utuafare e tia'i. E i reira, ia topa noa'tu te pene puha i raro e ia iti ta tatou faufaa e roaa mai na roto i ta tatou mau tereraa ohipa, eita ia tatou e riro mai te mau vahine maamaa o tei ore i hi'o i mua e o tei ore hoi i faanavai i ta ratou hinu mori. Ua ani te hoê taata ia Birigama Youne e, eaha te ravea maitai ia manuia roa te taata i roto i ta'na mau imiraa faufaa. Teie ia ta'na i pahono mai: *noa'tu i te iti o te moni apî e roaa mai i te hoê taata, mai te mea e iti a'e ta'na mau haamau'araa i ta'na moni apî, e toe mai â ia ta'na faufaa e eita roa oia e veve. E mai te mea e faaoromai oia i te hinaaro i te mau mea faufaa ore o teie nei ao, ma te haaputu noa i ta'na faufaa toe, i te mau matahiti atoa, te vai ra ia te mahana e riro ai oia ei taata faufaa rahi.* E parau mau roa ta Birigama Youne, mai te mea e rahi te apî e e iti a'e te haamau'araa, i te mau mahana atoa, e toe ihoa ia te faufaa e e onahia te taata.

E mea tia roa ia tatou ia haaputu i te moni no te tuuraa i ta tatou mau tamarîi i roto i te haapiiraa ia noaa ia ratou te ite, e ia roaa ia ratou te ite e noaa ia ta ratou mau ohipa maitai e e manuia ratou i roto i to ratou oraraa i te pae tino nei. Ua parauhia e, *O te hanahana o te Atua ra, o te ite ia*, no reira e mea tia roa, ia tatou, ia haapii i ta tatou mau tamarîi ia noaa ia ratou te ite. Ia noaa ia ratou te ite e ia paari ratou i roto i te reira ite, ua haere ia tatou i mua, i te pae tino e i te pae varua atoa hoi. Ia maramarama te taata i te mau mea o te tino nei e mea ohie atoa hoi to'na iteraa, e te marama-

ramaraa, i te mau mea o te pae varua. Ia apitihia te ite o te pae tino e te ite i te mau mea o te pae varua e tia'i, ei reira te Atua e mauruuru ai ia tatou.

No reira, e homa, e mea tia roa, ia tatou, ia hi'opoa maitai i to tatou haereraa e ia haaputu noa i ta tatou mau faufaa no te mau mea faufaa rahi o te ao nei. Eiaha tatou e haapao ore i te mau mea o teie nei ao, ta te Atua e horoa mai ia tatou nei. E mai te mea e haamau'a tatou i ta tatou mau faufaa i nia i te mau mea maitai o te ao nei e haamanuia roa te Atua ia tatou nei i te mau mahana atoa.

Papaihia'tu e te Peresiteni Misioni

E. Bentley Mitchell Jr. (Mitiela)

EDITORIAL

Oia mau ta'u e parau atu nei ia outou, O te ore e farii i te Basileia o te Atua mai te tamarii aruaru ra, e ore roa'tu oia e ô i reira. (Mareko 10:15) O tera ia te mea ta Iesu i parau atu i te mau taata i te taima Oia i rave ai i te mau tamarii i roto i To'na na rima no te haamaitairaa'tu ia ratou, no te mea ua ite Oia i te huru mau o te mau tamarii rii i nia iho i te ao nei. Ua ite Oia e, ua viivii ore ratou, e e mea fatata a'e ratou i te huru mau o te Atua i te tahi mau taata paari tei mau i te mau ite e te mau maramarama hoi o te ao nei.

I to tatou hi'oraa i te huru o te mau peapea e te mau mea iino i roto i te ao nei, e mea maitai ia feruri tatou e, o vai te tumu no te reira? O te mau taata ite e te mau taata maramarama anei, e a ore râ, o te mau tamarii anei? No te aha aita te mau taata ite e haapao nei i to ratou mau ite hohonu no te haamaitairaa i to ao nei e e faarue i te mau mana'o no te haapau i te reira? No reira paha aita o Iesu i faaau i to'

na basileia mai te taata paari no te mea ua ite Oia e, aita e tia Ia'na ia tiaturi e haapao ratou i Ta'na mau ture, ma te hape ore e te viivii ore hoi, mai te mau tamarii rii. Oia hoi, te auraa mau o taua parau ta Iesu i parau maira, o teie ia, o te mau taata te ô i roto i te Basileia o te Atua, o ratou ia te faahaehaa i to ratou aau no te farii i te îraa o ta'na Evanelia, o ratou tei oto, o ratou tei marû, o ratou tei hiaai i te maitai, o ratou te aroha ia vetahi ê ra, o ratou tei mâ te aau, o ratou te faatupu i te parau hau hoi, o ratou te tauturu i te faatupuraa i ta Iesu Ekalesia i nia iho i teie nei ao i teie mau mahana hopea nei. O ratou te haapao i te taatoaraa o te mau ture e te mau faaueraa atoa hoi, no ratou ia te basileia teitei, oia hoi te Basileia o Iesu Mesia e te mau tamarii rii atoa hoi.

E tamarii ana'e tatou paatoa na to tatou Metua i te ao ra, e mai te mea e hinaaro tatou ia farii i te haamaitairaa, mai te mau tamarii rii tei haamaitaihia e Iesu, i to'na nohoraa i nia iho i te ao nei, e mea tia roa ia tatou ia fariu e ia pee i te e'a Ta'na i faaineine na tatou. E ere i te mea tia ia vai te Peropheta no te ao nei, ia noaa ra to'na taria ia tia ia'na ia faaroo i te parau a te peropheta e ora nei.

Mai te matamua mai â, e tae roa mai i teie nei, ua tuu noa te Atua i ta'na haavaraa rahi i nia i te mau taata tei ore i farii Ia'na e i ta'na Evanelia hoi. I te tau o Noa ua haamou Oia i te mau taata atoa, maori râ o Noa e to'na utuafare, no te mea aita te mau taata i horoa'tu i to ratou mau taria no te faaroora i te ravea e noaa'i te ora mure ore, oia hoi, te Evanelia mau a te Atua tei porohia e to'na mau tavini. A hi'o atoa na tatou i te mau atî Nephi tei haamouhia no to ratou taivaraa rahi e no te mea aita ratou i farii i te basileia o te Atua mai te tamarii rii ra. Ahea râ te ao nei e ite ai e, eita e tia ia'na ia ora i nia a'e i te faito o te mau ino atoa ra, maori râ ia haapao tatou i te taatoaraa o te mau ture mure ore a te Atua, te horoa mai ia tatou i to tatou iho ora. O teie te taima e tia ia tatou ia faaineine ia tatou iho no te taima o to tatou haavâ-raa-hia e ia riro ia tatou te utu'a maitai hope ra i te rahi no ta tatou haapaoraa i taua mau ture ra, mai te ta-

marii rii te huru.

Te vai nei, i roto i te ao nei, te tahi pae taata tei feruri e, ua faataa te Atua i te mau tamarii i roto i na pupu e piti ra, oia hoi, te mau tamarii tei baptizohia e te mau tamarii tei ore i baptizohia ra. Teihea te reira mana'o i te vairaa i roto i te Bibilia? Ua ite tatou e, ua faaau Oia i to'na basileia mai te mau tamarii rii i te huru, e aita Oia i parau e, *Mai ia ratou tei baptizohia hoi te Basileia o te Atua ra*, no te mea, i muri iho ua rave Oia ia ratou i roto i to'na na rima e ua haamaitai atura ia ratou.

No reira ia hi'o tatou i ta tatou iho mau tamarii e ite ia tatou i te hoê haapiiraa rahi roa na roto i ta ratou haapao-maitai-raa mau i te mau mea atoa ta to ratou mau metua i parau e i haapii atu ia ratou ra.

Te haamaitai noa nei te Atua i ta'na mau tamarii te faaroo nei i Ta'na Evanelia ma te feaa ore, e mai te mea e hinaaro tatou ia haamaitahia tatou e tae noa'tu te noaaraa i te îraa o te mau haamaitairaa atoa, e mea tia roa ia riro tatou mai te tamarii rii i te aa haehaa, ia tia i te mau huero Evanelia atoa ia tupu i roto ia tatou paatoa.

Tei ia tatou te parau ia tatou iho e to tatou tiamâraa i te mau taime atoa, area râ, e mea tia ia tatou ia haamana'o e, e faautu'ahia tatou mai te au i te rahiraa o ta tatou iho haapaoraa i te ohipa maitai i nia iho i te ao nei.

Te vai nei te ravea e roaa'i te ora mure ore ia tatou nei, e mai te mea e navai to tatou hinaaro ia haapao i teie ture tumu ta Iesu i parau maira, e noaa ihoa â ia te reira ia tatou. O teie te ture matamua te tia ia tatou ia haapao, e mai te mea e haapao tatou i te reira ma to tatou puai e to tatoa itoitohoi, e mea ohie roa ia haapao i te mau ture e te mau faaue-raa-atoa-hoi te toe ra. O ratou te tamata e manuia ihoa ratou, e o ratou te tamau e tae noa'tu i te hopea ra no ratou hoi te basileia o te Atua e te ora mure ore hoi.

NO HEA MAI TE TAATA MAOHI?

I Te ava'e 1947, i mairi a'enei, ua faarue na taata too ono i te fenua Amerika Apatoa, na nia i te hoê paepae, no te faaiteraa i te mau taaata e parahi nei i nia i te ao nei i to ratou faaroo e, ua parahihia te mau motu o te Moana e te mau taata tei haere mai, mai te fenua Amerika Apatoa mai, i te mau tau i mairi a'enei. Ua tere noa ratou, i na mahana ra e 104, na nia i te moana, a puhia-noa-hi'ai ratou e te mata'i e a ume-noa-hia'i ratou e te opape o te moana. I te 7 no Atete ua hurihia to ratou paepae i nia i te aau o te fenua ra o Raroia, Tuamotu. Na roto i te reira tereraa ua faaitite mai ratou i to ratou faaroo e, e tia i te hoê paepae ia tere mai, na nia i te moana, a puhia-noa-hia'i e te mata'i e a ume-noa-hia'i e te opape, i te mau motu o te moana nei.

I roto i te Buka a Moromona, i te Alama i te pene 63, ua faaitehia e, te vai ra te hoê taata, o Hagota to'na i'oa, tei hamani i te hoê pahi rahi i te hiti o te fenua ra i Bounetifula, i pihaiho i te fenua ra i Desalotiona, e ua tuu atura i raro i te tai i te tooa o te râ, i pihai a'e i te fenua iti rairai e tae atu ai i te fenua i Apatoerau ra.

Teie te parau i papaihia i roto i te pene 63, i te irava 6 o te Buka o Alama: E inaha, e rave rahi o te mau taata o te ati Nephi tei tomo i roto ra, e reva'tura ma te huru maa e rave rahi, e na vahine e rave rahi, e te tamarii hoi, e fano tia'tura ratou i apatoerau. E hope a'era te toru ahuru e te hitu o te matahiti.

I teie nei taime te vai nei te mau Misioni no te Ekalesia a Iesu Mesia i te Feia Mo'a i te Mau Mahana Hopea Nei i te fenua Vaihi, te fenua Samoa, te fenua Tonga e i te fenua Niu Terani atoa hoi. Te vai nei te reira mau Misioni, no te Ekalesia, i te reira mau fenua no te mea ua ite papu matou

e, o outou mau te mau huaai o Lehi, tei haere mai i te fenua Amerika Apatoa, e rave rahi te mau matahiti i mairi a'enei, mai Ierusalema mai.

E no te mau tama'i e te mau pe'ape'a ua faarue ratou, oia hoi, taua mau taata e rave rahi, te fenua e ua tere atu i te mau fenua o te moana ia roaa ia ratou te tahi vahi apî ei parahiraa no ratou ma te pe'ape'a ore. E tuatapaparaa parau, te Buka a Moromona, no to outou hui tupuna tei iritihia, ei reo Tahiti, e te mau Orometua no teie nei Ekalesia. Ua ho-roahia mai te Buka a Moromona **ei pāpaa parau no to outou** hui tupuna, e i teie nei e tia ia outou iho ia tai'o i taua pā-paa parau ra e ia ite i te parau mau e vai nei i roto i ie reira.

Ua maitihia o Iosepha SEMITA, i te ao varua, no te haere mai e faatia faahou i te Ekalesia a Iesu Mesia i nia iho i te ao nei.

Ua parauhia, i roto i te Buka a Moromona, i te III Nephi, i te pene 3 e i te irava 6, **Ua parau maira Iosepha, na ô mai-ra, e faatupu te Fatu, to'u Atua, i te hoê hi'o, e e riro oia ei hi'o maitai no te huaai o to'u ra tauupu.**

E parau mau te reira no te mea no roto mai o Iosepha SEMITA i te tauupu o IOSEPHA tei hopoi-tîtî-hia i Aiphiti, e e huaai atoa hoi o LEHI no taua IOSEPHA ra. No reira a tai'o noa outou i te Buka a Moromona mai te au i te hinaaro o MORONI tei faaitehia i roto i te pene 10, i te irava 4 o ta'na buka tei na ô mai e: E o teie ta'u a'o ia outou na, ia itea teie nei mau parau ia outou, e ui atu i te Atua, i te Metua mure ore, i te i'oa o Iesu Mesia, ma te mana'o papu, e ma te faaroo i te Mesia, na'na ia e faaite mai i te parau mau na roto i te mana o te Varua Maitai.

Papaihia e: Daniela Orometua.

TE ORARAA NO TE TAATOARAA

E tuaatiraa teie.

TE UPUTA O TE RA'I.

Ua na ô ra te Fatu ra o Iesu: *Ia ore outou ia tatarahapa e ia baptizohia, e ore outou e ô i roto i te basileia o te ao ra.* Te titau nei te haereraa i te vahi i parauhia e te Fatu i te fariiraa i te tahi mau faaueraa. O teie ia te reira mau faaueraa matamua: te faaroo i te Atua e i ta'na opuaraa, te tatarahapa e te faaraveraa i te parau mau i te ohipa, te baptizoraa, e a ore râ, te fafauaraa ia faaroo i te ture a te Atua, na roto i te raveraa i te hoho'a o te poheraa e te tia-faahou-raa o te Fatu ra o Iesu Mesia. Ua titau-atoa-hia te reira mau mea i te feia i pohe ra. I roto i te ao varua te titau nei te ora i te faaroo e te tatarahapa. O ratou ana'e tei fariu to ratou mau varua i nia i te parau mau e tei haapae i te hape i roto i to ratou faaroo, mai to roto atoa i ta ratou mau ohipa, te tia ia tia i te mau haamaitairaa a te Fatu.

Area, te pape nei, e materia ia no teie nei fenua. No reira e tupu ihoa te uiraa e, e nahea te mau feia i pohe ra e baptizohia'i i roto i te ao varua, tei ore i farii i te reira oro'a i nia i te fenua nei, e tei noaa to ratou faaroo i reira e tei rave i te tatarahapa? E mea ohie roa te reira ravea, oia hoi, e tia roa i te mau taata e ora nei, i te ao nei, ia baptizohia ei mono no te feia i pohe ra, e ia ravehia te reira ohipa, tei parauhia e ohipa vicario, e ia fariihia te reira e te feia tei ore i baptizohia, tei ora i te ao ra, e mana ihoa ia te reira baptizoraa. Hoê â ia huru ahiri o ratou iho tei baptizohia.

Na roto i te reira ravea ua faaturahia ia te ture mo'a e e tia i te taata atoa, tei ora e tei pohe hoi, ia haapao i te reira.

I roto i te mau tau e rave rahi ua riro te faarueraa i te reira haapiiraa, o te haapiiraa hoi a te Ekalesia a te Mesia, ei tumu no te mau hape rarahi e te mau haapiiraa iino roa.

E OHIPA MONORAA.

E ere te reira ohipa, no te *Monoraa*, i te ohipa apî, oia hoi, ua mauui e ua pohe o Iesu Mesia ia tia i te mau taata atoa ia ora i muri a'e i to ratou poheraa i te tino nei. Area o ratou ana'e te faaroo i ta'na ohipa e tei haapao i ta'na mau faaueraa te farii i te horoaraa no te reira oraraa rahi ta'na i fafau mai. Na roto i te hoê raveraa tei faito i te reira, e tia i te mau tane, e te mau vahine, tei haamana'o i to ratou mau feia i pohe ra, ia bapetizohia ratou, no ratou, ia tia ia ratou ia haapao i te mau ture. Eaha te huru o te nehenehe o te reira ohipa, oia hoi, ia rave i te ohipa no to tatou mau tupuna ia tia ia ratou ia farii i te mau mea atoa tei roto i te *Opuaraa* ta te Fatu i horoa mai i te tamarî a te taata nei.

Area râ, i roto ana'e i te mau vahi mo'a te reira ohipa monoraa e ravehia'i, i roto i te mau hiero tei faataahia no te reira mau ohipa. Te vai nei ta te Ekalesia a Iesu Mesia i te Feia Mo'a i te Mau Mahana Hopea Nei mau hiero mai te reira e rave rahi, e i roto i te reira e ravehia'i te ohipa monoraa no te mau feia i pohe ra.

E faufaahia te reira mau raveraa mai te mea e ravehia i raro a'e i te mana no te ra'i mai. Eita roa e tia i te taata ia haru noa i te reira mana no te raveraa i te mau oro'a te haere roa i roto i te mure ore. Ua horoahia te reira mana i nia i te Ekalesia a Iesu Mesia i te Feia Mo'a i te Mau Mahana Hopea Nei. Ua mana ia te mau ohipa monoraa te ravehia nei i roto i te mau hiero; ua riro ia oia ei e'a i ropu i te feia e ora nei e te feia i pohe, i teie tau e i te tau a muri atu.

No reira e tia i te mau taata ia farii i te oaoa no te riroraa, no te feia i pohe ra, ta tatou i here, ei *Mau Faaora i nia i te mou'a o Ziona*, e na roto i te reira ua tia atoa, i te mau taata atoa, tei ora i nia i te fenua nei, ia haere mai e tuu ia ratou i raro a'e i te hoê noa iho ture.

UA OTI TE OHIPA.

Ia tae te tau e ite ai ratou, tei ora e tei pohe atoa, i te Evanelia e ia bapetizohia ratou atoa e ia faaroo ratou i te mau faaueraa atoa te horoahia mai ia ratou, ua oti ia te ohipa tumu no te hamaniraahia o teie nei ao, e ua fatata ia oia i to'na hopea.

Ua horoahia te ora, oia hoi, te oaoa mure ore, i te mau taata atoa. Eita te reira e noaa ia ratou atoa i roto i to'na îraa, no te mea aita te hinaaro o vetahi i aratai ia ratou na nia i te e'a afaro. Area râ e haavâhia ratou atoa mai te au i ta ratou mau ohipa, e e farii ihoa te taata hara rahi roa a'e i te hoê hanahana tei ore roa i mana'ohia e ana ra.

Na te reira huru haapiiraa e faaore i te parau no te hoê auahi mure ore e e monohia te reira e te hoê oto rahi no te mea e hanahana iti tei noaa ia ratou na roto i to ratou rave-raa i te hara. E riro te otoraa, e te manini o te feruriraa, ei mau tufaa no te pô auahi, e aita ratou i haapae-roa-hia, e tia râ ia haamâruhia no te rahi o te aroha o to tatou Metua i te ao ra.

Ia tae mai te maramarama mure ore no te hoê haapiiraa mai te reira, e mo'e te mau haapiiraa paari a te taata nei. E oaoa e e ou'aou'a te mafatu o te taata no te reira tiaturiraa rahi, te reira here rahi e to ratou atoa ra mau hotu.

Tei roto te reira mau parau mau i te Ekalesia a Iesu Mesia i te Feia Mo'a i te Mau Mahana Hopea Nei e tei reira atoa te reira mau haapiiraa, tei faaûrûhia. **Ua ite anei outou i te reira?**

Papaihia e: John A. Widtsoe.

EAHA TO TATOU HURU IA HI'OHIA MAI?

IA haere atu tatou i te Atua no te haamori atu ia'na, e a ore râ, ia afai atu i te tao'a hopoi noa, eaha to tatou huru i mua i to'na na mata?

Ia hi'o mai Oia ia tatou e ite ihoa oia i to tatou huru mau.

Eita e tia ia tuuhia te hoê paruru i mua i to'na mata. Eita atoa e tia ia tatou ia haavare atu e ia huna atu i to tatou huru mau. E ite noa to'na mata, te ite i te mau mea atoa, i te huru o to tatou mau mafatu e to tatou mau varua, i roto ia tatou, e e ite oia i to tatou mau hinaaro mau.

Te ite nei anei Oia, i roto ia tatou, te hoê aau tae mau, tei faaetaetahia to'na faaroo e te ohipa maitai? Te ite nei anei Oia, i roto ia tatou, te hinaaro i te tuu atu i te Atua i mua roa i roto i to tatou nei oraraa? Te ite nei anei Oia, i roto ia tatou, te hinaaro i te tauturu ia vetahi ê, ma te hinaaro i te tuu atu i te mau mea atoa i nia i te fata o te aroha, mai te mea ua titauhia te reira?

E a ore râ, te ite nei anei Oia, i roto i to'na hi'opoaraa ia tatou, te faahua faaroo nei tatou Ia'na, ma te faaea noa, te haamori nei tatou Ia'na ia au i to tatou iho mau hinaaro, e aita hoi tatou e tuu nei i to tatou haereraa faaroo ia haape'a-pe'a i ta tatou mau raveraa ohipa e te mau arearearaa o te mahana ra? E a ore râ, te ite nei anei Oia i te hoê aau o tei hinaaro i te tavini i na fatu e piti ra, ma te manuia ore hoi i na pae e piti ra? Te ite nei anei Oia ia tatou i rotopu i te feia e parau e, e ere i te mau ohipa i te mea titauhia no te faaoraraa, mai te mea te faaite puai nei tatou i to tatou faaroo? Te ite nei anei Oia e, te mana'o nei tatou e, e ere i te mea tia ia ora noa tatou mai te au i te mau mea atoa ta tatou e tiaturi nei? Eaha te mau mea Ta'na e ite nei i reira?

I te taime i afai mai ai o Caina, raua o Abela, i ta raua tusia, ua patoihia ta'na tusia e ua fariihia ta Abela, no reira *Ua inoino roa o Caina e ua riri oia. Parau atura te Fatu ia Caina e, Eaha oe i riri ai e no te aha to oe mata i rumaruma'i? Ahiri oe i rave i te mea maitai eita anei oe e fariihia? E ia ore oe ia rave i te mea maitai, tei te pae uputa noa iho te hara.* Ua patoihia ta'na tusia no te mea aita to'na oraraa

i tano maitai i te peu no te afairaa i te tusia i te Fatu ra. Ite atura oia i te faufaa o te parau paari tei na ô mai, *E mea faufau na te Fatu te tusia a te taata hara.* Aita oia i ite e, te titau nei te Fatu i te aau o te taata ma te haavare ore. (Buka Fafau 64: 34)

Ua faahiti mai o Moroni i te parau a to'na metua tane tei parau mai e, *O te taata ino noa'i, aore i tia ia'na i te rave i te mea maitai ra; ia hopoi hoi oia i te mea horoa noa e ia pure hoi oia i te Atua ma te mana'o ore, e ore oia e faufaahia e hoê iti a'e. Inaha hoi, aita'tura ia te reira e haapaohia ei parau-tia na'na ra. Inaha hoi, ia hopoi mai te taata ino i te mea horoa noa ra, ua na reira mai oia ma te nounou; no reira ua haapaohia atura ia na'na mai te mea ra e ua tapea-mauhia e ana; no reira ua haapaohia'tu ia taua taata ra ei mea ino i mua i te Atua. E ua na reira atoa i te haapaohia ei mea ino na te taata ia pure oia ma te hinaaro ore i roto i to'na aau; aore atoa oia e faufaa e hoê iti a'e i te reira; aita hoi te Atua e ite i te taata mai te reira te huru.* (Moroni 7: 6-9)

I te tahi atu taime ua parau te Fatu, *Te taata te faahepo-hia i roto i te mau mea atoa ra e taata faatau oia, e e ere oia i te tavini maitai; no reira eita oia e farii i te utu'a maitai. Oia mau, te parau atu nei au, ia rave ihoa te taata i te ohipa maitai e ia rave ratou i te reira na roto i to ratou iho hinaaro, e ia na reira ratou e tupu ia te parau-tia. Te taata te ore e rave i te hoê mea, maori râ ia faauehia oia ra, e ia farii oia i te reira faaueraa ma te aau tae ore, e ia rave noa oia ma te faatau noa, ua noa ia ta'na faahaparaa.* (Buka Fafau: 58)

Mai te mea te tiaturi nei tatou i roto i te haapiiraa no te faaroo tei amuihia i te ohipa, a paturu atu ai i to tatou faaroo i te ohipa maitai, e rahi ia tatou i roto i ta tatou mau ohipa, e rahi roa ia tatou i roto i ta tatou mau raveraa, e haa-

maitai tatou i to tatou iho huru, e i te hopea, e piri rii ia tatou i te faito o te Atua.

No reira, ia hi'o mai te Fatu ia tatou, te ite nei Oia i te mau taata hinaaro mau e tei faaite i to ratou huru mau, ma te imi ore i te otoheraa, e e haamauruuru mai Oia ia tatou, mai to au i to tatou iho huru.

Eita e tia ia tatou ia ape i te parau mau e vai ra i roto i te parau tei na ô mai, te faito ta outou e faito atu, o te faito ia e faito atoa hia'tu ai outou ra. E noaa ia tatou te mea ta tatou i titau. Mai te mea e mea parau-tia tatou e farii ia tatou i te utu'a no te parau-tia. Mai te mea e mea huru parau-tia ore rii tatou e farii atoa ia tatou i te utu'a e faito i te reira. I ta te Atua hi'oraa e faautu'ahia te taata mai te au i te mau ohipa ta'na i rave, noa'tu i te mea maitai e te mea ino atoa hoi. No reira ua riro te taata nei ei haavâ no'na iho e na'na iho e faaineine i ta'na iho utu'a.

E mea au roa na te Atua te parau-tia. Area te haavare râ e mea au ore ia Na'na. Mai te mea te titau nei tatou ite mau haamaitairaa o te Fatu, ia riro ia tatou ei feia parau-tia i mua i To'na aro, mai te au i to tatou hinaaro ia na reira mai Oia ia tatou. E i reira tatou e farii ai i te utu'a o te taata parau-tia ra.

Faaauhia e Marcel Bonnet

E PARAU NA TE MAU TUAHINE NO TE EKALESIA

IA ora na outou, e te mau Tuahine no te Ekalesia nei. Na tatou atoa teie apĭ, na te mau tuahine. Ua haamaitai-mau-hia tatou e te Atua no te mea te parahi nei tatou, i nia i te ao nei, i teie tau no te îraa o te Evanelia. Tei

ia tatou, te mau metua, te faatupuraa i te hau i roto i to tatou iho mau utuafare. Mai te mea e utuafare hau to tatou mau utuafare e riro taua mau utuafare ru ei tufaa no Ziona. E haapiiraa maitai a'e to tatou haapao-maitai-raa, i mua i te aro o to tatou mau tamarîi, i ta tatou a'o-noa-raa ia ratou.

TE FAAIPOIPORAA

O te faaipoiporaa te ture ta te Atua i horoa mai na te taatoaraa o te taata nei, no reira e mea mo'a taua ture ra. Ia faature te tane, e te vahine, i te ture no te faaipoiporaa, e ia faatura e ia herê hoi raua, te tahi i te tahi, e tia'i.

E mea maitai ia tahoâ raua i to raua haapaoraa. E mea maitai atoa ia imi raua i te mau ravea no te faatupuraa i te oaoa, te tahi i te tahi, na roto i te here e te ohipa. Na roto i to raua faaitoitoraa e to raua faaafaroraa maitai e maitai ai to raua utuafare.

E ere te faaipoiporaa i te parau faaau ana'e no te pae tino nei, e ere atoa no te feia te haamana'o ia ratou iho ana'e. E ere i te mea tia ia riro te hoê hara iti ha'iha'i ei tumu no te faataaraa i te faaipoiporaa. E ere atoa te faataaraa i te mea hinaarohia.

Teie hoi te tumu matamua no te faaipoiporaa, no te parururaa ia i te mau tino, e te mau varua, o te mau tamarîi e no te faatiamâraa ia ratou. Te hopoia o te metua tane, o te faatereraraa ia, te parururaa e te hi'oraa ia i to'na utuafare. Teie hoi ta te metua vahine utu'a, o te fanauraa mai ia e te haapaoraa, mai te here, i to raua mau tamarîi. Mai te mea e a'o atu te hoê o na metua i te tamarîi, ma te afaro, eiaha ia te metua e faatia i te hape o te tamarîi. Eiaha hoi te metua tane, e te metua vahine, e faaino noa'tu i te tahi e i mua i te aro o ta raua mau tamarîi. Ia na reira raua e riro te reira ei haapiiraa ino roa na ta raua mau tamarîi e ei faahamaraa e ei haamauiuiraa aau hoi i te mau tamarîi.

E mea tia ia paraparau e ia feruri na metua no nia i to raua mau fifi, ma te inoino ore, ia oti ra a pure atu ai i te Atua no nia i tau mau fifi ra, ia tahoêhia to raua mana'o. E mea tia hoi ia haamana'o raua e, e ao faaineineraa teie no te ao a muri atu, e ia ora noa raua ma te hau. Ia na reira raua e haamaitai te Atua i to raua taatiraa.

Papaihia e: Ruta Mitia.

TE MANA NO TE RA'I MAI.

Te faufaa ore o te mau faaueraa tei ore i faatiahia.

Te mau faaueraa no te Evanelia tei parauhia a'enei ra, eita roa e tia ia ravehia ratou, maori râ, ma te mana no ô mai i te Atua ra, no te mea e ere te taata te tumu no te reira, e eita atoa hoi e tia ia'na ia na reira. E parau mau, e tia ia haruhia te reira e e tia hoi i te mau taata teoteo ia faahiti i te i'oa o te Atua ma te farii-ore-hia e ratou te hoê parau no ô mai Ia'na ra. Area râ e mea faufaa ore ta raton mau rave-raa, e eita te Atua e ite i te reira, i nia i te fenua nei e i te ra'i atoa ra. Mai te mea aita e heheuraa no te ra'i mai eita e tia ia vai, i nia i te fenua nei, te mana no te ra'i mai. Noa'tu ia ravehia te baptizoraa i roto i te huru raveraa a te Fatu, e ta'na mau pipi, e mea faufaa ore te reira e eita te reira e haamatara i te hara, maori râ ia farii te taata te rave i te reira i te mana no te raveraa i te reira na roto i te i'oa o te Metua, no te Tamaiti e no te Varua maitai hoi. Noa'tu e, ia haapao te mau taata i te mau ture no te tuuraa rima, ia na reira ratou i nia i te hoê taata tei baptizohia na, mai te mea aita ratou i faataahia e te Atua, eita roa te Varua Maitai e pou mai i nia i te taata faaroo apî e ua faufaa ore atoa te tamauraa i mua i te mata o te Fatu. E faahapahia te feia tei haru noa i te reira mana no te raveraa i te mau ohipa i roto

i to'na i'oa. Eita roa e tia i te hoê apooraa, te hoê pŭpŭ taata e te hoê amuiraa, noa'tu i to ratou rahiraa, te tiaraa maitai, te paieti e te paari o to'na mau melo, ia horoa i te hoê noa a'e tufaa iti no te mana no te ra'i, maori râ ua farii te reira mau taata i te reira na roto i te hoê faaiteraa no te ra'i mai. No te pae tino ana'e to ratou mana e aita ta ratou mau faaotiraa, e ta ratou mau hiro'a faaroo e faufaa i roto i te opuaraa no te ora.

E tuaatihia teie parau i te ava'e i mua nei.

TE HAERE NEI TE EKALESIA I MUA

Ua faaroo tatou e, ia tae-faahou-mai te Mesia i nia i te ao nei, e riro Oia ei Arii e ei faatere i nia i te ao atoa nei e e faatere Oia i to'na mau feia parau-tia ra. O tatou te mau melo no ta'na Ekalesia, i teie nei, e riro ia tatou ei mau melo mau i roto i to'na ihora hau ia tae i te reira taime. O teie ia te tumu te Ekalesia i imi ai i te ravea ia roaa ia'na te mau vahi faaapuraa, te mau fare ma'i e te tahi atu â mau mea e rave rahi, ia riro te reira mau ohipa maitai ei tantururaa e ei haamaitairaa no te ao atoa nei.

Te mau Fare ma'i no te Ekalesia.

Te vai nei te hoê Fare ma'i, no te tamarii rii ana'e, i Roto Miti, Utaha. Ua rahi roa te mau tamarii pohe ma'i tei tae atu i taua fare ma'i ra ia tau-turuhia ratou. I na ava'e i mairi a'enei ua faatia-faahou-hia te hoê Fare ma'i apî, na te mau tamarii, i Roto Miti. Te opua nei te Ekalesia i te faatia i na fare ma'i apî e toru i te tahi atu â mau vahi i roto i te tufaa fenua Utaha. Ua hoo atoa mai hoi te Ekalesia i te hoê Fare ma'i no te taata paari, e i teie nei ua roaa ia i te Ekalesia e vau fare ma'i.

To te Ekalesia mau Fare haapiiraa teitei.

Te vai nei, i teie nei, e toru Fare Haapiiraa teitei na te Ekalesia a Iesu Mesia. E tia i te mau taata, noa'tu i to ratou huru, ia haere i reira no te haapii atu i te huru ite atoa tei titauhia e te oraraa o teie mau tau hopea nei, no te mea, *O te hanahana o te Atua ra, o te te ite ia.*

Ua riro te hoê Fare rahi ei Fare pureraa.

Ua roaa mai i te Ekalesia te hoê fare rahi, e piti tahua e te afa to'na. E faahuru-ê-hia teie fare e e faarirohia ei Fare Pureraa no te hoê Amaa. Ua fatata teie fare i te aivi ra Cumora, te vahi i horoahia'tu ai te mau api, no te Buka a Moromona, e te melahi ra o Moroni, ia Iosepha Semita.

Marcel BONNET Gérant et Imprimeur, Papeete, Tahiti.
